

## **TORAH (WET) EN GENADE**

### **LES 5: TORAH: 'n VADER-KIND VERHOUDING VAN GELOOF**

#### **INLEIDING**

1. In vorige lesse het ons geleer dat Torah'n dubbele doel dien, naamlik:
  - Alles het deur Torah (YHVH se Woord) ontstaan en alles word deur Torah onderhou (in stand gehou) (Joh. 1:3; Kol. 1:15 tot 17). Torah het dus skeppingskrag, asook die vermoë om alles wat geskep is te onderhou. Hierdie is die eintlike doel van Torah. Daarom sal die mens wat aan Torah gehoorsaam is 'in stand gehou word', naamlik geseën word met voorspoed, gesondheid, vrede, vreugde, wysheid, ensovoorts.
  - Torah openbaar sonde. Dit leer die mens wat is sonde (Rom. 3:20), maar is self nie sonde nie (Rom. 7:7). Die Wet (Torah) is die aanklaer. Dit is die hoogste gesag in die hemel en op die aarde. Almal staan in die beskuldigingsbank, want niemand is sonder sonde nie (Rom. 3:23; 1 Joh. 1:10). Die mens wat een deel van die wet (Torah) oortree, is skuldig aan alles wat in Torah beveel word (Jak. 2:10 en 11). Hierdie skuld las het veroorsaak dat Torah nie meer sy eintlike doel kan dien nie, naamlik om die mens te seën. YHVH het egter 'n oplossing!!
2. Die Torah is van die begin af aan die mens gegee sodat hy daarvolgens kan lewe en YHVH se seën kon ontvang (Gen. 1:28 en 29; Gen. 2:15 tot 17). Na die sondeval is dit uitgebrei toe YHVH aan Moses die Wet (Torah) by die berg Sinai gegee het (Ex. 24:3, 7 en 8). Weens die sondeval het die mens 'n sondige natuur wat veroorsaak dat hy nie meer aan Torah gehoorsaam kan wees nie. Torah het nou die aanklaer en vonnisoplegger van die mens geword. Nou was Torah die tugmeester van die mens, want die mens het onder die wet gestaan.
3. Yeshua Messias het egter ons sondeskuld op Hom geneem en ons vrygemaak van hierdie skuld las en ons onder die genade van YHVH geplaas (Rom. 6:14). Die aanklag is nou teruggetrek en nou kan elkeen

wat deur Yeshua met Vader-God versoen is, weer die seëninge wat Torah belowe, ontvang. Die voorwaarde is egter dat ons steeds Torah as Vader-God se wil vir ons aanvaar en moet strewes om daaraan gehoorsaam te wees. Ons doen dit nie om daardeur gered te word nie, maar om deel te hê aan die seëninge wat dit vir ons bring. Daarom vind ons nou vreugde in Torah (Rom. 7:22), want ons is nie meer onder die wet nie, maar onder die genade van YHVH ons Vader wat ons seën.

4. Die vloek van die wet, naamlik die sondeskuldbrief, is aan die kruishout gespyker (Kol. 2:14). **Let wel:** Dit is nie die wet (die Torah) wat aan die kruis gespyker was nie!! Geloof in die versoeningswerk van Yeshua het dus nie die wet opgehef nie, maar het dit juis bevestig (Rom. 3:31)

*Toe u woorde (Torah) gevind is, het ek hulle opgeëet, en u woord was vir my vreugde en vrolikheid vir my hart; want u Naam is oor my uitgeroep, YHVH, God van die leërskaare! Jer. 15:16*

*Mensekind, laat jou buik eet, en vul jou ingewande met hierdie rol (Torah) wat Ek jou gee. En ek het dit geëet, en dit was in my mond soos heuning so soet. Eseg. 3:3*

## **DIE VADER-KIND VERHOUDING**

1. Torah is 'n demonstrasie van die verhouding tussen 'n vader en sy kind. Die taak van 'n vader is die volgende:
  - Om sy kind te onderrig. Op die wyse word die kind geleer en verkry hy kennis.
  - Om sy kind instruksies te gee. Hierdie is die moets en moenies van die lewe. Dit is die voorskrifte, wette en beslissings wat van toepassing is op die onderrig (kennis) wat die kind ontvang het.
  - Om 'n rolmodel vir sy kind te wees van hoe kennis en instruksies op 'n voordelige wyse toegepas word. Hierdie is die leerstellings van die lewe wat die openbaringskennis van wysheid en insig is. Kennis is dit wat jy leer; wysheid en insig word verkry deur die praktiese toepassing van kennis en instruksies waar te neem.
2. Onderrig en instruksies is oorvleulend en onlosmaakbaar aan mekaar verbind. Kennis sonder instruksies, asook die omgekeerde, is nutteloos. Waarneming van die Vader se optrede, naamlik sy woorde, dae en praktiese toepassing van kennis, gee wysheid en insig. Hoe beter 'n kind onderrig is en hoe meer volledig die instruksies is wat hy ontvang het, hoe makliker is dit vir hom om wysheid en insig te bekom. Wysheid en insig is die vermoë om kennis en instruksies aan te wend ten einde die regte lewensbesluite te neem wat voorspoed en sukses verseker.

3. Die vader gee onderrig en instruksies aan sy kind omrede hy vir hom liefhet. Sy doel is dat sy kind 'n suksesvolle en geseënde lewe sal hê. Hy begeer dat dit met sy kind goed moet gaan.
4. Onder die nuwe verbond het YHVH die verantwoordelikheid as Vader hernu om elkeen wat deur geloof in Yeshua met Hom versoen is te leer en te lei. As ons Hemelse Vader gee Hy aan ons, Sy kinders, ook onderrig en instruksies en is Hy ook ons rolmodel wat ons die openbaringskennis van wysheid en insig gee (Matt. 11:29; Joh. 7:16). Dit alles doen Hy deur Sy Torah wat Hy aan ons gegee het.
5. Onder Sy genade gee Vader-God aan ons elkeen Sy Gees wat ons sal leer en sal lei aangaande alles wat in Torah (die Woord) opgeskryf is (Joh. 14:26). Sy genade en liefde vir ons is so groot dat Hy dit alles by wyse van 'n verbond met ons bevestig en bekragtig.

*Want dit is die verbond wat Ek ná dié dae sal sluit met die huis van Israel, spreek YHVH: Ek sal my wette (Torah) in hulle verstand gee en dit op hulle hart skrywe; en Ek sal vir hulle 'n God (Vader) wees, en hulle sal vir My 'n volk (kinders) wees.*

*En hulle sal nie meer elkeen sy naaste en elkeen sy broer leer en sê: Ken YHVH nie; want almal sal My ken, klein en groot onder hulle.*

*Want Ek sal barmhartig wees oor hulle ongeregtighede en aan hulle sondes en hulle oortredinge nooit meer dink nie.*

Heb.8:10 tot 12.

6. Vader YHVH het aan ons Sy Torah gegee omrede Hy vir ons lief is. Al Sy onderrig, instruksies en leerstellings is aan ons gegee sodat ons volkome voorbereid en toegerus kan wees vir elke goeie werk (2 Tim. 3:16 en 17). Daarom is Torah nie bedoel om YHVH se straf te wees nie, maar om die mens daarmee te seën. Torah is Vader-God se liefde in aksie.

## **TORAH EN GELOOF**

1. Hoewel ons slegs deur geloof gered kan word, en die wet (*Torah*) ons nie kan red nie, onderwerp ons onself steeds aan die wet. Deur ons aan Torah te onderwerp, bevestig ons juis Vader-God se onderrig en instruksies. Ons bevestig dit ondermeer deur wedergeboorte, want dit is om te glo dat Torah ons skuldig bevind en ons die straf verdien en dat die loon van die sonde die dood is (Rom. 6:23). Yeshua Messias bevestig Torah (die wet) deurdat Hy die straf wat ons toekom op Hom geneem het. Daarom maak ons nie die wet tot niet deur ons geloof nie, maar ons geloof is juis bevestiging van Vader-God se Torah – dit is 'n bevestiging dat ons steeds gehoorsaam aan Torah moet wees (Rom. 3:31).
2. Torah word nou deel van ons geloofsluwe, want dit is nie net YHVH ons Vader se wil vir ons nie, maar ook Sy onvoorwaardelike liefde vir ons word deur Sy Torah openbaar gemaak. Deur Torah te leef en toe te pas,

sal ons gesëen word met voorspoed, gesondheid, vreugde, vrede, wysheid en elke ander goeie gawe (Jak. 1:17). In Yeshua Messias is Torah nie meer 'n las nie, maar 'n seën.

3. Onder die genade van Vader YHVH sal ons in alle opsigte volop hê en oorfloedig kan wees tot elke goeie werk (2 Kor. 9:8). Hy voorsien die saad aan die saaiër, maar verseker ook die oes sodat ons in alles (geestelik en materiëel) ryk kan wees en om ook aan ander uit te kan deel (2 Kor. 9:9 tot 11).
4. Torah is die goeie saad wat ons ontvang. Wanneer ons Torah in geloof saai deur dit toe te pas, sal ons Vader 'n goeie oes verseker. Dan sal die vrug van ons geregtigheid toeneem (2 Kor. 10:10). YHVH se Woord, naamlik Torah, is soos reën wat die aarde deurvogtig sodat die saad kan ontkiem en 'n oes voortbring. Hierdie Woord sal nooit leeg na Hom terugkeer nie, maar sal dit doen waarvoor dit bestem is, naamlik om voorspoed en seën te bring (Jes. 55:10 en 11).
5. Volgens Heb. 11:1 is geloof om seker te wees van dit wat ons hoop en oortuig te wees van dit wat ons nie kan sien nie. Geloof is dus 'n vaste vertrouwe in Torah, want dit is die dinge wat ons hoop. Wanneer ons Torah lees, of hoor, kan ons egter nie die sigbare resultaat daarvan sien nie, hoewel ons glo dat dit die bewys daarvan is. Eers wanneer ons Torah toepas (implementeer) deur nougeset daarvolgens te handel omrede ons dit glo, dan sal dit in ons lewens manifesteer (die resultaat sal sigbaar word). Dit wat Torah belowe, sal waar word wanneer ons dit doen. Ons doen dit omrede ons dit glo, maar meer nog, omrede ons geloof het in YHVH ons Vader wat dit vir ons gegee het. Hy is die waarmaker van Sy Woord, naamlik *Torah* (Num. 23:19).
6. Ons kan ook met 'n vaste vertrouwe na ons Vader gaan, want Hy is 'n beloner van die wat Hom soek (Heb. 11:6). Ons weet ons sal beloon word, want in Yeshua Messias het ons aan die vereistes van Torah voldoen. Al oortree ons weens menslike swakheid, ontvang ons telkens genade van vergifnis en in Yeshua is ons dus mede-erfgenaar van die seëninge van Torah (Gal. 4:7).
7. Dit beteken egter nie dat ons kan aanhou sondig omrede ons nie meer onder die wet is nie, maar onder die genade. (Rom. 6:1, 2 en 15). Nee, ons glo ook dat ons vir die sonde dood is en lewend is vir God in Yeshua (Rom. 6:11).
8. As geregverdigdes lewe ons uit die geloof (Rom. 1:17). Ons geloof is:
  - In YHVH ons God en Vader en in die versoeningswerk van Sy Seun, Yeshua ons Messias.
  - In Torah as die onderrig, instruksies en wysheid wat YHVH aan ons gegee het sodat ons in alles voorspoedig kan wees.

- Dat ons in Yeshua vir die sonde dood is en daarom die seëninge wat Torah belowe kan ontvang. Die wet van die Gees van die lewe in Yeshua Messias het ons vrygemaak van die wet van die sonde en die dood (Rom. 8:2).
- Dat ons deur die inwonende Gees van YHVH geleer en gelei word om al hoe meer gelykvormig aan Yeshua, en derhalwe aan Torah, te word.

### **BEPEINS OF BESPREEK DIE VOLGENDE**

1. *Die beginsel van die wysheid is die vrees van YHVH, en kennis van die Afgesonderde (Heilige) is verstand. Spr.9:10.* Is Torah YHVH se wysheid en hoekom?
2. Het jy geweet dat die Torah totaal gekant is teen die misbruik van mag en die uitbuiting van mense? Lees Deut 10:17 en 18. Sal die wêreld 'n beter plek wees indien elke mense volgens alles wat in Torah geskryf staan lewe? Is 'n Torah-leefwyse as geregverdigde in Yeshua nie juis bedoel om YHVH se Koninkryk hier op aarde te vestig nie?
3. Deuteronomium 28 is bevestiging dat Torah-gehoorsaamheid YHVH se seëninge meebring, terwyl ongehoorsaamheid aan Torah YHVH se oordeel (vloeke) tot gevolg het. Is moedswillige Torah-ongehoorsaamheid dan nie om jouself te vervloek nie?
4. Lees 1 Joh. 3:4. Wat is sonde? Hoe verduidelik jy in een kort sinnetjie vir iemand wat sonde is?

*Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).*

Shalom tot volgende keer.  
Johan Kriel

Epos: [kontak@nuwelielied.info](mailto:kontak@nuwelielied.info)  
Webwerf: <http://www.nuwelielied.info>

*Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.*